

Unimas sampai mesej antirasuah

Oleh ZAPHNE PHILIP

utusansarawak@utusan.com.my

KOTA SAMARAHAN 18 Dis. -

Mahasiswa Universiti Malaysia Sarawak (Unimas) yang menyertai Kempen Sik Mok Rasuah diharap dapat menjadi penyampai mesej antirasuah kepada masyarakat di dalam dan luar kampus.

Menurut satu kenyataan yang dikeluarkan oleh Unit Komunikasi Korporat Unimas, harapan itu adalah kerana peserta di-dedahkan tentang peranan yang dimainkan oleh Suruhanjaya Pencegahan Rasuah Malaysia (SPRM).

“Dengan adanya program seperti Kempen Sik Mok Rasuah ini, diharap dapat memberi kesedaran kepada penuntut dan seluruh kakitangan universiti itu tentang gejala rasuah yang boleh merosakkan negara.

“Di samping itu, program berkenaan turut meningkatkan kesedaran dan penghayatan terhadap nilai-nilai integriti semasa menjalankan tugas,” jelas kenyataan akhbar itu.

Kempen Sik Mok Rasuah yang me-

rupakan kerjasama dua hala antara Unimas dan SPRM Sarawak berlangsung selama seminggu bermula 22 November hingga 8 Disember lalu.

Majlis penutupnya dihadiri Timbalan Naib Canselor (Hal Ehwal Pelajar dan Alumni), Prof. Mohd. Fadzil Abdul Rahman dan Pengarah SPRM negeri, Bahri Mohammad Zin.

Menurut kenyataan itu lagi, pelbagai aktiviti dijalankan sepanjang kempen berlangsung antaranya pertandingan senam tari antara kolej kediaman pelajar dan konvoi berbasikal yang turut disertai oleh Dekan Pusat Pemajuan Pelajar, Prof. Madya Dr. Rusli Ahmad.

Turut berlangsung ialah program *PhotoGen No Corruption* yang mencakupi peraduan melukis poster, pertandingan buku skrap, penulisan esei anti rasuah dan pertandingan video animasi dan filem pendek.

“Pada majlis penutup pula diadakan pertandingan *Cheers Ganyang Rasuah*, pertandingan dikir barat dan sidang pleno,” jelas kenyataan itu lagi.



MAHASISWA Universiti Malaysia Sarawak menyertai Kempen Sik Mok Rasuah di Kota Samarahan, Sarawak, baru-baru ini.